

Matumuuna Naalackersuisut Inatsisartut Suleriaasianni § 33 naapertorlugu aalajangiiffigisassatut siunnersuut manna saqqummiuppaat:

Ruslandimut Belarusimullu killilersuutaasunik suliniuteqarnissat naammassineqarnissaat pillugit Kalaallit Nunaannut inatsisissamut siunnersuutip atuutsinneqalernissaa pillugu Inatsisartut aalajangiiffigisassaattut siunnersuut
(Naalackersuisut Siulittaasuat)

Tunngaviusoq

2022-mi upernaakkut ataatsimiinnermi (UPA2022) imm. 178: ”*Uunga siunnersuut: Ruslandimut allanullu pillaatitit iliuusissanik atuutsitsilernissamut piginnaatitsissuteqarneq pillugu Inatsisartut inatsisaat*”, Naalackersuisunit saqqummiunneqartoq, Inatsisartut suliaraat akueralugulu.

Ruslandimut allanullu pillaatitit iliuusissaasinnaasut suliassa qarfinnut akisussaaffigilerlugit tiguneqareersunut aammalu suliassa qarfinnut akisussaaffigilerlugu tiguneqariinngitsunut tunngassuteqarsinnaanerit pissutigalugu, inatsisissatut siunnersuut assingusoq Folketing-imit akuerineqartariaqarpoq. Tamanna 2022-mi upernaakkut ataatsimiinnermi immikkoortup 178-ip suliarineqarnerani Inatsisartunut aamma paasissutissiissutigineqarpoq.

Inatsisartut aalajangiiffigisassaattut siunnersuut ilanngunneqartoq, danskit inatsisissatut siunnersuutaata Kalaallit Nunaannut atuutsinneqalernissaata Inatsisartunit akuerineqarnissaanut tunngassuteqarpoq. Inatsisartut aalajangiiffigisassatut siunnersuut akuerissappassuk, inatsisissatut siunnersuutip tamatuma kingorna inaarutaasumik atuutsinneqalersinnaanissaanut, taanna Folketing-imi suliarineqartussaassaaq akuerineqartussaassallunilu.

Inatsisissatut siunnersuutip imarisamigut ”*Ruslandimut allanullu pillaatitit iliuusissanik atuutsitsilernissamut piginnaatitsissuteqarneq pillugu Inatsisartut inatsisaat*” assingaa, kisianni inatsisilioriaatsikkut allaanerulaartumik aaqqissugaalluni.

Namminersorlutik Oqartussat suliassa qarfinni akisussaaffigilerlugit tiguneqarsimanngitsuni Ruslandimut allanullu pillaatitit iliuusissanik akuersinissaannut suliap ingerlanera, suliassa qarfinni akisussaaffigilerlugit tiguneqareersimasunut suliap ingerlanerisa assingissavaa.

Suliassa qarfinni akisussaaffigilerlugit tiguneqarsimanngitsuni suliap ingerlanerani taamaalilluni danskit ministeriannit Naalackersuisunut siunnersuummik saqqummiisoqassaaq. Tamatuma kingorna Naalackersuisut Inatsisartuni Nunanut Allanut Sillimaniarnermullu Ataatsimiititaliaq isumasiussavaat. Aammalu aatsaat tamatuma kingorna Kalaallit Nunaata

pillaatitut iliuusissat pineqartut akuerissanerai akuerissannginneraalu pillugu Naalakkersuisut danskit ministeriannut oqaaseqaateqarsinnaapput.

Pisortanut aningaasaqarnikkut allaffissornikkullu sunniutaasussat

Siunnersuut Kalaallit Nunaanni pisortanut aningaasaqarnikkut sunniuteqassanngilaq.

Namminersorlutik inuussutissarsiortunut aningaasaqarnikkut allaffissornikkullu sunniutaasussat

Siunnersuut imminermini Kalaallit Nunaanni inuussutissarsiortunut aningaasaqarnikkut sunniuteqassanngilaq. Taamaattoq nalunaarutit inatsisissatut siunnersuut tunngavigalugu aalajangersarneqarsinnaasussat, maleruagassanik inerteqquteqarnernillu, Kalaallit Nunaanni inuussutissarsiortunut aningaasaqarnikkut allaffissornikkullu sunniuteqarnerluttussanik, imaqaassapput.

Innuttaasunut aningaasaqarnikkut allaffissornikkullu sunniutaasussat

Soqanngilaq.

Tusarniaaneq

Siunnersuut piffissami 20. juli-19. august 2022 Naalakkersuisut tusarniaanermut nittartagaanni tamanut ammasumik tusarniaassutigineqarpoq.

Ilanngussat

1. Uunga siunnersuut: Ruslandimut Belarusimullu killilersuutaasunik sulissutiginninnissat naammassineqarnissaat pillugit Kalaallit Nunaannut inatsit.
2. Ruslandimut Belarusimullu killilersuutaasunik suliniuteqarnissat naammassineqarnissaat pillugit Kalaallit Nunaannut inatsisissatut siunnersuut pillugu eqikkaaneq.